



Här Fernand Etgen

President vun der Deputéiertechamber

19, um Krautmaart

L-1728 Lëtzebuerg

Lëtzebuerg, den 20. August 2019

Här President,

Sou wéi d'Chambersreglement et virgesäit, bieden ech Iech, dës parlamentaresch Fro un den Här Baussen- an Immigratiounsminister weiderzeleeden.


Zënter 2015 sinn eng Rei vu Persounen am Mëttelmier vu staatlechen a private Schëffer opgeholl ginn - dovu konnten der och eng Rei aus enger Noutlag befreit ginn oder esouguer virum Erdrénke gerett ginn. Lëtzebuerg huet bis elo sou Leit reegelméisseg opgeholl och wann ëmmer manner Länner dat maachen. Besonnesch a leschter Zäit ginn dës Aktiounen awer staark kontestéiert. De Verdacht läit no, datt et sech bei verschiddene vun esou Rettungsaktiounen a Wierklechkeet ëm Aktivitéiten handelt déi organiséiert Schleiseraktiounen bewosst oder onbewosst ënnerstëtzen.

Dowéinst wollt ech dem Här Baussen- an Immigratiounsminister eng Rei Froen an dem Zesammenhank stellen:

1. Wéi vill Leit huet Lëtzebuerg zënter 2015 aus maritimen Hëllefaktiounen am Mëttelmier opgeholl? Wéi vill Persounen vu wéi enger Schëffer? Wéi e Geschlecht a wéi eng Nationalitéit haten déi Persounen?
2. Wéi e legale Statutt hunn déi Leit wann si op Lëtzebuerg kommen? Gëtt et eng Einzelpruefung fir auszeschleissen, datt et sech ëm ekonomesch Migranten handelt?
3. Wéi vill vun deene Leit sinn elo nach zu Lëtzebuerg an ënner wéi engem Statutt? Hu si eng Familljenzesummefeierung gemaach? Wa jo, wéi vill Persounen aus wéi enger Länner sinn nokomm?
4. Wéi vill aner europäesch Staaten hunn bei deene verschiddene Aktiounen matgemaach? Wéi huet sech d'Zuel vun deene Staaten zënter 2015 entwéckelt an aus wéi enger Grënn?
5. Wéi eng europäesch Staaten hu wéi vill Persounen aus wéi enger maritimen Hëllefaktiounen opgeholl? Wéi ass dee Lëtzebuurger Bäitrag am Verglach mat den Ustrenge vum anere Staaten zé bewäertën?

6. Wéi ass d'Interpretatioun vun der Lëtzebuerger Regierung iwver déi Dispositiounen am Internationaale Séirecht, déi bestëmmen, datt Leit déi aus Séinout gerett gi sinn, sollen an dee noosten, sécheren Hafe bruecht ginn? Kann dat och en Hafen an Afrika sinn?

Mat déiwem Respekt,



Fernand Kartheiser
Deputéierten



10 SEP. 2019

**Äntwert vum Här Jean Asselborn, Immigrationsminister, op d' parlamentaresch Fro
Nummer 1087, vum 20. August 2019, vum honorabelen Deputéierten Här Fernand Kartheiser**

1. Wéi vill Leit huet Lëtzebuerg zënter 2015 aus maritimen Hëllefaktiounen am Mëttelmier opgeholl? Wéi vill Persoune vu wéi enge Schëffer? Wéi e Geschlecht a wéi eng Nationalitéit haten déi Persounen?

Lëtzebuerg bedeelegt sech säit dem Summer 2018 un der Ëmverdeelung vu Persounen aus aneren EU Memberstaaten, déi no Hëllefaktiounen am Mëttelmier vun diverse Schëffer ukommen. An de Jore virdrun, vun 2015 bis 2017, gouf et en EU wäiten Ëmverdeelungsprogramm, deen ënnert dem Lëtzebuerger Virsätz vun der EU beschloss gouf, an duerch dee Ronn 34 000 Persounen aus Griicheland an Italien a 25 EU an associéiert Staaten opgeholl goufen, fir hier Asyldemande an deem Land ze maachen.

Trotz der Noutwendegkeet fir eng méi dauerhaft Léisung fir déi aktuell Situatiounen am Mëttelmier ze fannen, fënnt des Ëmverdeelung bis dato nach ëmmer *ad hoc* an op fräiwëlleger Basis statt.

Säit 2018 sinn an deem Kader 41 Leit zu Lëtzebuerg ukomm. Dës Persoune waren op der MV Lifeline, der Aquarius, der Seawatch III, der Alan Kurdi an der Cigala Fulgosi. Wat d'Nationalitéit vun de Leit ubelaangt, esou waren et 17 Persounen aus dem Sudan, 7 aus Eritrea, 6 aus Somalia, 4 aus dem Nigeria, a 7 Leit aus diversen anere Länner. Dorënner waren 39 Männer, 1 Fra an 1 Kand.

2. Wéi e legale Statutt hunn déi Leit wann si op Lëtzebuerg kommen? Gëtt et eng Einzelpruefung fir auszeschléissen, datt et sech em ekonomesch Migranten handelt?

D'Leit déi an deem Kader op Lëtzebuerg kommen, hunn de Statut vum "*demandeur d'asile*". Si duerchlafen déi normal individuell Asylprozedur hei am Land.

3. Wéi vill vun deene Leit sinn elo nach zu Lëtzebuerg an ënner wéi engem Statutt? Hu si eng Familljenzesummefeierung gemaach? Wa jo, wéi vill Persounen aus wéi enge Länner sinn nokomm?

Vun deene betreffende Leit kruten der 2 den internationale Schutzstatut zougesprach. Bei deenen anere Persounen ass d'Prozedur nach net ofgeschloss.

An deem Kontext ass et nach net zu enger Familljenzesummefeierung komm.

4. Wéi vill aner europäesch Staaten hunn bei deene verschiddenen Aktiounen matgemaach? Wéi huet sech d'Zuel vun deene Staaten zënter 2015 entwéckelt an aus wéi enge Grënn?

D'Unzuel vun de Länner déi säit 2018 deelhuele bleift relativ stabil. Lëtzebuerg ass, nieft Frankräich, Däitschland, Portugal an Irland, ënnert deene Länner déi ganz kontinuéierlech matgemaach hunn. Donieft hunn och Länner wéi Spuenien, Finnland, d'Belsch, Holland, Litauen, Bulgarien, Rumänien a Slowenien Leit opgeholl.

5. Wéi eng europäesch Staaten hu wéi vill Persounen aus wéi enge maritimen Hëllefaktiounen opgeholl? Wéi ass dee Lëtzebuerger Bäitrag am Vergläich mat den Ustreuung vum anere Staaten ze bewäerten?

Souwäit eis déi aktuell Zuele virleien, si bis dato iwwer 840 Leit vu Rettungsschëffer opgeholl ginn. Dovunner huet Frankräich iwwer 580 Leit opgeholl, Däitschland 190, Spuenien em déi 100, Portugal 90. De Bäitrag vu Lëtzebuerg ass kohärent matt där vun eis gefuederter gemeinsamer europäescher Migratiounspolitik.

6. Wéi ass d'Interpretatioun vun der Lëtzebuerger Regierung iwwer déi Dispositiounen am Internationale Séirecht, déi bestëmmen, datt Leit déi aus Séinout gerett gi sinn, sollen an dee noosten, sécheren Hafe bruecht ginn? Kann dat och en Hafe an Afrika sinn?

Ee Staat deen d'Responsabilitéit huet fir Séinoutrettung a sengem deklariéierte Sich- a Rettungsberäich ze maachen, och bekannt ënner SAR Responsabilitéitszone, huet d'Obligatioun fir des Leit op eng sécher Platz ze bréngen. Eën Net-Regierungsschëff wat eng Séinoutrettung duerchgefouert huet, muss Zougang op dee nooste sécheren Hafe hunn. Allerdéngs kann Libyen net als sécheren Hafe bezeechent ginn, wéinst den intensive Kämpf an den Informatiounen iwwer Verletzunge vun de Mënscherechter déi do stattfannen.

Wann Asylsichender op engem Schëff si wat si aus Séinout gerett huet, da mussen des Leit an engem Land ausgeschëfft gi wat d'Genfer Flüchtlingskonventioun vu 1951 konform zu de Kritäre vum UNO-Flüchtlingskommissariat applizéiert. Doraus ergëtt sech, dass ee Schëff dat ënnert engem europäesche Fändel fiert, keng Asylsichender kann a Libyen ausschëffen. Dëst gouf eendeiteg vum Europäesche Gerichtshaff fir Mënscherechter am Uerteel vum 23. Februar 2012 an der Affär Hirsi Jamaa an anerer géint Italien (Requête Nummer 27765/09) bestätegt. Et ass ervierzehiewen, dass reegelméisseg Persounen déi no un der nordafrikanescher Küst aus Séinout gerett ginn an Tunesien ausgeschëfft ginn.



LE GOUVERNEMENT
DU GRAND-DUCHÉ DE LUXEMBOURG
Ministère des Affaires étrangères
et européennes

Le Ministre

CHAMBRE DES DÉPUTÉS

Entrée le :

10 SEP. 2019

Luxembourg, le 10 septembre 2019

Le Ministre des Affaires étrangères et européennes, Ministre de l'Immigration et de l'Asile
à
Monsieur le Ministre aux Relations avec le Parlement

Je vous prie de bien vouloir trouver, en annexe, la réponse de Monsieur le Ministre des Affaires étrangères et européennes, Ministre de l'Immigration et de l'Asile à la question parlementaire n° 1087 posée par l'honorable Député Monsieur Fernand Kartheiser.


Jean Asselborn